

学行典

學行典第一百七十六卷

志道部名賢列傳七

明五 汪賞

按休寧縣志汪賞號石賓石田人邑庠生有志正學事親以孝聞喪葬禴嘗一遵考亭儀節祝令世祿雅相推重創還古書院延爲院長旣沒爲作狀有云講學四十年無挫志獨棲于還古山舍究心奧旨開誘同人伏臘寒暑無輟諸語

楊通儒

按休寧縣志楊通儒字幼鈞司理奎子通子史百家尤潛心理學晚築達道堂立率真會偕兄弟子姪講貫年八旬手書先儒語錄四十餘卷次年自知逝期子跪請遺訓曰上帝臨女無貳爾心戰戰兢兢何事多言遂無疾終

程以莊

按休寧縣志程以莊字臨之由溪人孝友性成弱冠渡江抵泰州拜王心齋祠見其堂廡刻有樂學

歌額署鐵漢二字不覺欣然神往遂私淑于朱儒齋朔望講學不輟每一講格物良知紛紛聚訟獨能出胸中所見以折其衷諸同人咸稱新安道脈不墜厥後率子若孫負笈海陵北面心齋祠幾三十餘載其向道之心老而彌篤壽登八十有六

汪學聖

按休寧縣志汪學聖字惕若篤學醇修於書無所不讀發言制事鄉里咸服後講學東林及歸里與同人講學紫陽還古書院崇尚朱子所著有問易思成錄等書

汪浚

按休寧縣志汪浚字泰茹博覽羣書弱冠卽孳孳還古紫陽兩書院講學涵養純靜舉動一無所苟喪葬悉遵文公家禮力闡釋老形家言晚年尤好易日持一編不釋手學者多師事之

朱弘

按休寧縣志朱弘字濟臣月潭人與人樂易胸中毫無渣滓嘗欲志子路之志學會子之學喜聞己過以省身慎獨爲要與汪惕若施虹玉聯會講學切磨甚密一時有志道學者咸師事焉

束桓

按丹陽縣志束桓字子威生有異資家貧日鮮再食而誦讀不輟爲學根究性命務爲躬行雖屢挫于時向道彌篤時丹徒殷士望居丹陽與桓月爲講會其學以孝弟求仁爲本敦朴存誠爲務興起後學至老不倦學者稱懷玉先生

于廷燮

按金壇縣志于廷燮字調陽沈靜好古篤志理學爲時所稱年三十八卒

許紀

按揚州府志許紀字崇志少不羈長乃折節務學篤志聖賢之道喜怒不形舉止凝重居常閉戶默坐與人講學言簡理該莫能窺其際年四十八卒

楊春芳

按陝西通志楊春芳字旭門三原人莊嚴峭重勵志濂洛關閩之學以恩選入都授洛川訓導轉鎮遠教諭樂道敦仁諸生企慕之以爲弘農清德再見云

張大有

按太平府志張大有字若無號放菴鍵扉慕道參程朱濂洛奧旨家雖壁立不以貧易所學也其執經問字者蓋履滿戶外云

丁賢

按潛山縣志丁賢字希聖天性敦敏少以理學自勵應恩選讀書南雍一時士林宗之其學直參濂洛之微晚補河南內鄉令稱循吏解組後貧居屢空恬如也惟日事著作歌咏以自適卒年八十六

涂榮臺

按潛山縣志涂榮臺號望軒天資穎異年十三從父講孟子浩然章退而著知言養氣論父見之曰此理學要訣也孺子能爲是語乎及長教授生徒以省身克己爲要對人每寡言笑談及理要則津津言之終日不倦一時向道之士出其門牆者不下百人嘗謂鹿洞鵝湖宗風未墜虛言不若實踐之爲得也屢舉鄉賓沒年七十有三

楊儀

按常熟縣志楊儀字鳳瑞幼聰敏長而好學其學一以程朱爲準隱居講誦問字之履恆滿年八十
三卒崇祀鄉賢

王世祿

按青陽縣志王世祿十五都人邑庠生持身端亮幼慕理學率門人暨子一楨一幹講學太白書院
闡明良知宗旨所著有南溪遺稿及語錄等書若干卷行世

施達 陳自藻

按青陽縣志施達十六都人字下之幼慕理學厭薄制舉慨然以聖人爲可學深究濂洛關閩之傳
其論以性情爲田禮義爲柄博學爲致知篤行爲誠意曾與楊貞復祝無功兩先生會講於金陵學
者翕然宗之晚更肆力詩歌古文築講堂九華天柱峰下人稱天柱先生崇禎間公卿應詔徵辟首
以先生名上堅臥弗出既卒門人私謚曰文信著有易信序卦雜卦圖解讀書知孝經注儒行注韓
文徵詩賦古文諸集門下士惟陳氏自藻最著先生所著述皆命校正發梓常以接後學期之繼卒
同門獨迓主配祀天柱先生

古今圖書集成
方繼誠

按青陽縣志方繼誠號文坡四都人研究理學與焦漪園楊後巖倡道金陵所著有語錄諸書甚富因被火不傳

施天遇

按青陽縣志施天遇邑庠生十六都人博學多通與弟天柱先生同堂講論爲理學名儒

儲滋

按宜興縣志儲滋字剛夫改字康夫少爲諸生有聲及學于錢一本遂棄舉業專心學道人以爲迂獨浙江章正宸一見執弟子禮直指使祁彪佳聞其賢請見不得欲索所著書薦於朝滋以疾辭乃表其門曰理學眞儒所著有易疑春秋屬比直書數十卷藏於家生平好靜坐不耐俗紛讀性理至天地混闢一氣渙然有得自是人我無間處喧不亂云嗣子種字二禾克紹家學綽有父風著周易集義識者稱之

黃廣

按江南通志黃廣字冠龍無錫人少從顧憲成兄弟游遂淬志理學乙丑丙寅間詔毀書院時璫焰熾廣日趨講席不輟高攀龍死難有司欲繫其子廣聞之要華孝廉國材極陳罪不及孥之意其子獲免己已以貢除鎮江學博旋擢安遠令先是邑有重獄讞辟候決忽流賊至脅獄囚皆從之中有董傳等願出死力守城城得不潰尋以疾卒於任所著有禮樂合編承天紀世覽玉磬齋詩集諸書

張雲鸞

按江南通志張雲鸞字羽臣無錫人孝弟廉正數以文字受知於有司然一無干謁惟覃精經史刻求聖賢心蘊雅善講說遠邇名家爭以厚禮延至師事之從同邑顧憲成游著東林講議祁彪佳按吳式其廬一時與二鄒齊名

丁明俊

按江南通志丁明俊字彥超無錫人年近壯始志於學舉動一遵儒禮每日靜坐雖盛暑不弛冠服論學一宗紫陽

華允誼

按江南通志華允誼字汝正無錫人允謀仲弟也孝友質直力追古人領歲薦不赴廷試初偕其弟允誠受易於毘陵錢一本繼見高攀龍於東林聞其教憬然有得從事敬靜晚自號後菴年八十四卒學者稱龍超先生著有三象粹精春秋傳載記纂疏等書

秦爾載

按江南通志秦爾載字彥熙無錫人梁之孫少受書於葉茂才以親賢遠佞見稱旣而師事高攀龍刻近思錄朱子節要二書每日手著功過於籍以自糾考事後母孝自奉薄好施予子鏞鈺鏌皆有學行

柳鴻

按江南通志柳鴻字漸于德化人郡學生性恬淡不趨勢利讀書攻苦屢入棘闈輒不第續得金谿餘姚二先生語錄遂留心探索於知行合一之旨深有悟焉

郝維持

按陝西通志郝維持安定人天資明粹自少究心理學以六經爲本講學四十餘年文章氣節一時

宗之爲準繩焉

湯開運

按江南通志湯開運太平人仕中翰天性孝友留心理學以聖賢自待卒年七十三

袁國光

按江南通志袁國光字賓求篤意孝友研精理學步趨不苟當遊學新安旅次拾遺金俟其人還之娶某女爲妾知爲故家女竟還其父聘金置勿問易簀時謂門弟子曰爲學須尋究孔孟至要處汝輩識之毋忽言已而逝

李惟精

按江南通志李惟精字允中蒙城人少志聖賢之道日夜勤思豁然通一貫之旨著太極一貫諸解官婺源司訓

秦鏞

按江南通志秦鏞字大音無錫人年十一而孤謹守父訓事母盡孝登崇禎丁丑進士令清江五年

凡所釐舉務求實惠己卯分校所得知名士歸里蕭然木榻絕不通人研極性命之理疾革口授辭世語弟鏌代寫畢徐請歸正寢年六十五從祀東林道南書院著有易序圖說周子通書解皇極內篇小衍參同閣集奏疏講錄諸書

吳學

按江西通志吳學字原思玉山人有志濂洛關閩之學補邑庠生受知于督學曰吳生程朱之流未可量也

徐伯鳳

按江西通志徐伯鳳字國祥貴溪人生平學尊朱子而以小學近思錄爲工夫嘗曰言忠信行篤敬卽此便是良知讀書白鹿洞歸益精進每教人靜坐澄心以觀清明之氣少時執母喪廬墓三年及司訓紹興聞父訃跣行抵舍有雙鵲巢廬之祥人以爲孝感所致

陳元琛

按江西通志陳元琛字仍玉高安人質行端方文學淹博以貢任南康府訓督學聘主白鹿洞倡明

濂洛關閩之學四方名士景從咸謂江右徵君章璜以後一人遷建昌教諭從遊講學者益衆有興
賢易俗之風致仕家居讀書自樂學者稱見南先生

王象泰

按山東通志王象泰字子循新城舉人覃心程朱之學淡泊榮利隱居不仕

王翼

按山東通志王翼字翀翱在平人事親以最孝稱潛心性命之學師宏山先生著良知解格物致知
諸說

蘇光顯

按山東通志蘇光顯濮州人覃心理學稱東郡名儒

梁方圖

按廣西通志梁方圖懷集人年十六卽有志程朱之學崇禎閒以明經歷象左二州教職陞平樂府
授講學不倦督學黃公景明曰吾道在子矣粵俗停柩數十年不葬公力白上官一時出喪者以數

萬計又刊家禮四訓約要以教民皆感化致仕歸八十四卒所著有五經要旨忠孝節廉等傳崇祀鄉賢

杜惟熙

按浙江通志杜惟熙號見山東陽人成童時卽有志理學及長師事盧一松先生講五舉書院多所領悟一松稱其邁往精進事之幾十年歸嘗言學者一息不昧則萬古皆通一刻少寬卽終朝欠缺故其學以復性爲宗克欲爲實際精研力究不舍晝夜晚而益純張鳳梧建崇正書院聘主教席啟悟後學甚衆年八十餘卒

陳時芳 倪珩

按浙江通志陳時芳號春洲師事見山殫精默會盡得其傳博覽多聞而歸于實踐以修悟交融爲極體羸弱至講論輒娓娓不倦著宗傳廣錄邵魯遺芳行世後有倪珩者潛心經史不事鉛華以聖賢理學爲己任偶一試制舉藝曰冀得一第以慰吾親耳年少補弟子員以攻苦致疾死

徐廷玠

按浙江通志徐廷玠字元度上虞人從劉宗周陶爽齡講學於證人堂闡明性理有繼往開來之功

徐奮鵬

按江西通志徐奮鵬字自溟臨川人講道授徒常苦毛詩朱傳煩簡不齊至學者昧比興之旨爲之刪補言者議其擅改經傳請治罪闕之謂此書實有功朱傳事遂寢自是鵬名益著四方裹糧問業履滿戶外學者稱爲筆峒先生

范璿

按浙江通志范璿字廷潤會稽人少卽有志道學嘗謂人曰天下有至寶得而玩之可以忘貧作古詩二十章歷敘道統及太極之說以自見平居無戲言步趨不越尺寸里中人無老幼皆以范聖人呼之

吳翼聖

按浙江通志吳翼聖字尊王蕭山人諸生父日鑄庭訓曰兒輩讀書寧讀死勝悶死翼聖鍵戶者十餘年闡發濂洛諸家苦學成疾易簀時猶曰吾雖博極羣書奈未慰父心何言未竟而卒所著有韋

齋集中分性學異同諸解共十五篇

何浩然

按浙江通志何浩然字希孟嘉善人邑庠生浩然少從錢相國士升遊博通典籍以道學爲己任杜門不出蕭然物外年七十四卒門人私諡曰仁節先生

申志學

按浙江通志申志學字希聖幼孤事母孝及長篤志理學言行不苟後學多宗之年七十一終

林宗

按浙江通志林宗字子恆八歲能著文及長爲學以紫陽爲宗授徒講學多所成就卒年六十有五

志道部藝文一

送孫正之序

宋王安石

時然而然衆人也已然而然君子也已然而然非私己也聖人之道在焉爾夫君子有窮苦顛跌不肯一失詘己以從時者不以時勝道也故其得志於君則變時而之道若反手然彼其術素修而志

素定也時乎楊墨已不然者孟軻氏而已時乎釋老已不然者韓愈氏而已如孟韓者可謂術素修而志素定也不以時勝道也惜也不得志於君使真儒之效不白於當世然其於衆人也卓矣嗚呼予觀今之世圓冠峨如大裙襜如坐而堯言起而舜趨不以孟韓之心爲心者果異衆人乎予官於揚得友曰孫正之正之志古之道又善爲古文予知其能以孟韓之心爲心而巳者也夫越人之望燕爲絕域也北轅而首之苟不已無不至孟韓之道去吾黨豈若越人之望燕哉以正之之不已而不至焉予未之信也一日得志於吾君而真儒之效不白於當世予亦未之信也正之之兄官於溫奉其親以行將從之先爲言以處予予欲默安得而默也慶曆二年閏九月十一日

與陳傳道序

楊時

予嘗謂學者視聖人其猶射之於正鵠乎雖巧力所及有中否遠近之不齊然未有不志乎正鵠而可以言射者也士之去聖人或相倍蓰或相什伯所造固不同然未有不志乎聖人而可以言學者也自孔子沒更戰國至秦遂焚書坑儒士六經中絕漢興雖稍稍復出然聖學之失其傳尙矣由漢至唐千餘歲士之博聞彊識者世豈無其人耶而卒未有能窺聖學之堂奧者豈當時之士卒無志

於聖人耶而卓然自立者何其少也若唐之韓愈蓋嘗謂世無仲尼不當在弟子之列則亦不可謂無其志也及觀其所學則不過乎欲雕章鏤句取名譽而止耳然則士固不患不知有志乎聖人而特患不知聖人之所以學也且古之聖人固宜莫如舜也舜之在側微與木石居鹿豕遊固無異於深山之野人也是豈以文采過人耶伏羲畫八卦書斷自堯典當是時六經蓋未有也而舜之所以聖者果何自哉夫舜聖人也生而知之無事乎學可也而下則未有可以不學者也舜之臣二十有二人相與共成帝業者是果皆生知耶不然其何以學也由是觀之六經雖聖人微言而道之所存蓋有言不能傳者則經雖具猶不能諭人之弗達也然則聖之所以爲聖賢之所以爲賢其必有在矣雖然士之去聖遠矣舍六經其何以求聖人哉要當精思之力行之超然默會於言意之表則庶乎有得矣若夫過其籬籬望其門牆足未踰闕而輒妄意其室中之藏則幸其中也難哉嗚呼今之士未嘗以此學也類皆分文析字屑屑於章句之末甚者廣記問工言辭欲誇多鬪靡而已烏用學爲哉彭城陳君傳道志學之士也其將之官也求予言故因爲發之然未知陳君果以我言爲然耶其未以爲然耶幸明告我庶幾其有警也